

Jon Manénkir Kumwimp Pas

Mekia Akwapnám Kar

Jon te Jisas éréképá yárákimp éntér-sámpramp arop ou mekamp ankwapono. Mao taun Efesus mek yaká yakea, wae mér pourouria, Jisas pokám yopwar 60 yopwar niamp arake fek mámá pas má kumwimpon.

Mao wanánko, arop ankwap fárakap kwekárá sérrá, “Apárokamp aropamp pourou te kwataeria, kwatae ninik am mek yak námpara, Jisas te Kwaromp Tárápara, apárokamp arop pourou kare sámp naenámp pourou mono.” Aerá sénapantá, mao te koumteouráp aropamp ninik fwapokwapi pap naeria, mámá pas kumwimpon.

Tá ankwap kar te ará: ‘Kwar te ponankor aropan nouroup námpara, yumo kor ankár ponankor aropan nounouroup kip’rá sénámpon.

Yiki yak sánk konám kar

1 ¹Mámá yiki yak sánk konám kar te me koum sik yakámpan yino wae maomp kar wa, tá yinomp yi kare fek man wae nke, tá yino man tokoreyakáprá, tá yinomp yae korao maomp pourouk wae sámp, maki námp kwamp, yino mámá kar farákáp konámpono.^a ²Am yiki yak konámpao érik koropeanánko yino waeman kare nke námpan, yumwan am yiki yaká yakáp mwanám kar érik farákáp konámpon. Am yiki yak te wokwaek kar Naropwarént yakámpan maok, oukoumwan te wae érik koropeanánko yino nke námpon.^b ³Yino nkeaka wawinámp karan yumwan farákáp nánko, yumo kor má kar wariaka yinont ankár pourouráp ninik fek yakápria, nomo énéni Naropwar ntia maomp Táráp Jisas Kraisént ankár pourouráp ninik fek yakáp mwanámpon. ⁴Yino mámá kar má kumwi nám te, nomp warákár te tokwae kari yak naenámpria námpono.

^a 1:1 Jo 1:1-2,4 ^b 1:2 Jo 1:14

Nomo ankár wae fek paokop mwanámp kar

⁵Yino maomp Tárápao sérimp karan wawianámpan yino yumwan farákáp námp te ará: Kwar te ankár wae tokwaerápara, man te kirikip kánanke yak mono.^c ⁶Táte nomo sérrá, ‘Ono Kraisént ankár pourouráp ninik nampono’rá sénámpao maok, nomo am ninikaok paokop moria, nomo kirikip mek paokop námp te, nomp kar te kwekárámpara, nomo te kare kar ninikaok paokop mo i konámpon.^d ⁷Táte Kwaro wae fek yak námpnám taknám nomo kor wae fek paokop námp te, nomo ankár pourouráp ninik fek nounourouprá yakáp nánko maok, Kwaromp Táráp Jisasomp yirirao nomp kwatae ninik ponankor yárári pwaránko, nomo yiki kor kwapwe yakáp i konámpon.

⁸Táte nomo ‘Ono kwatae ninik te yak mono’rá sénámp te, nomoku támao kwekárá sénámpara, kare kar sér i konap ninik te nomp ninik mek yak mo námpon. ⁹Aeno táte nomp kwatae ninik Kwarén érik sénánko te, Kwar te ‘Námoku tak nanamp’rá séritenám kar ták-pwar mono, yae-párák kare ninik fek nomp kwatae ninik ponankor torokorrá épéria nik mo, pwar nánko, nomp ninik yiki kukur kwapwe naenámpon. ¹⁰Táte nomo sérrá, ‘Ono te kwatae ninik moi nampono’rá sénámpao maok, nomo takrá sénámp kar támao ‘Kwar te kwekár i konámpon aropono’rá sénámp niampon. Aenámpara, Kwaromp kar te nomp ninik mek te yak mono.

Krais nomwan yaewour i konámpon kar

2 ¹Onomp tárápu^e o! Ono ankár yumo kwatae niniki kwaponoria yiráp por má kar kumwi nampono. Aeno táte arop ankwap warko kwatae ninik fek akwap nánko te, nomwan yaewouranoria Kwarén sér i konámpon arop Naropwar Kwarént yak námpon. Am te yae-párák kare arop Jisas Kraisono.^f ²Kwaro nomp kwatae ninik fek nomwan yonkwae pwarámp námp te, Jisas námoku térea nomp kwatae ninik tirá épéri námpon. Mao taki námp te, nomwan saráp yaewour naeria tére mono, má apár mekamp arop ponankor yaewour naeria sumpwi námpon.^g

³Nomwan Kwaro sénámp lo kar wawia mántwaok saráp paokop námp te, am támao nomo Kwarén mér karnámpon yénkép námpon. ⁴Aeno arop ankwap ankárankao ‘Ono Kwar te wae mér nampono’rá sénámpao, Kwaromp lo karaok yarak monámpon arop te kwekár námpara, kare kar sér i konap te maomp ninik mek yak mono.^h ⁵⁻⁶Aeno arop ankwapao Kwaromp karwaok akwap námp te, mao tak námp támao nomwan

^c 1:5 1 Ti 6:16; Je 1:17 ^d 1:6 1 Jo 2:4 ^e 2:1 Jono ‘Tárápu’rá sénámp te, mao kar farákáp nánko, wawia Kraisonámpok koroea Kristen yakápnas sios fákáreran sénámpon.
^f 2:1 Hi 9:24 ^g 2:2 Jo 1:29; 11:52; Ro 3:25 ^h 2:4 1 Jo 1:6,8

yénképrá: Maomp Kwarén warákárnámp ninik te wae pwi kare yak námpon. Tá arop ankwapao ‘Ono Kwarént yak namp’rá sénámp te, ankár Kraiso yáraki námpnámp taknámp yarak nánko maok, mao Kwarént yak námp mér mwanámpon.^{i j}

**‘Arop ankwapyaenápen nouroup námp te, Kwaromp
wae fek yak námp’rá sénámp kar**

⁷Ononamp fárákap, ono yiráp por kumwinamp lo kar máte wourékam lo kar mono, épi lo kar wokwaek kar yumo sámpap támaono. Am épi lo te yumo wokwaek wawiap kar támaono.^{k 8} Aeno am lo ono warko yiráp por kumwi namp máte, wourékam lo niampono. Nomo wae mér námpon: Má wourékam lo máte Krai námkuráp ninik mek yakriaka, yiráp ninik mek kor tére námpon. Am te apae riteanápe, kirikip te wae pwar naeria nánko, Kwaromp wae karerao koropá yak námpon.^l

⁹Táte arop ankwapao ‘Ono te Kwaromp wae fek yak nampono’rá sénámpao maok, Kristen ankwapyaenápen kokwarokria warákár mo námp te, mao oukoumwan kirikip mek yak námpono.^{m 10} Aeno arop Kristen ankwapnápen warákár konámp te, mao te waeman wae fek yak námpara, apae ankankao man nánkáráp nánko sikirip naenámpnaná?''ⁿ
¹¹Tá Kristen ankwapyaenápen kokwarok i konámp arop te, kirikip mek yak námpon. Mao te kirikip mek yarak námpara, kirikipao yi nánkárápeyak nánko, mao te apae mwae-páraok akwap raerá mér mo i konámpon.^o

¹²Onomp tárápu o! Yumwan Kraiomp e kárákáre fek Kwaro yiráp kwatae ninik tirá épéri námpantá, yiráp por kumwi nampon.^p

¹³Naropwaryaenáp fákáre, yumo máma arop wokwaek kar yakeanámpao, oukoumwan taki yak námp wae mér napon. Aenapantá ono yiráp por kor má kar má kumwi nampon. Menkou-tárápu, yumo waeman Satanén kwepwate napantá yumwan kor má kar má kumwi nampon.

¹⁴Tárápu, yumo te Naropwar Kwarén waeman mér napantá, ono má kar kumwi nampon. Naropwaryaenáp fákáre, yumo kor máma arop wokwaek kar yakeanámpao oukoumwan taki yak námp wae mér napantá, ono má kar má kumwi nampon. Menkou-tárápu, yumo te kárákáreria Kwaromp kar yiráp ninik mek yak nánko, Satanén waeman kwe-pwate napon. Aenapantá ono yiráp por máma kar kumwi nampon.

Nomwan ‘Apárokamp ninikan warákár kwapono’rá sénámp kar

¹⁵Yumo te apárokamp ninikan warákárriaka apárokamp ankankan kor ponankor mént warákár mwanape. Arop ankwapao apárokamp ninikan

ⁱ 2:5-6 Jo 14:21,23; 1 Jo 4:12,17; 5:3 ^j 2:6 Jo 13:15 ^k 2:7 2 Jo 5-6 ^l 2:8 Jo 1:9; Ro 13:12 ^m 2:9 1 Jo 3:10,15; 4:20 ⁿ 2:10 Ro 14:13 ^o 2:11 Jo 12:35 ^p 2:12 1 Ko 6:11

warákárámp te Naropwarén te warákár mo i konámpon.^q 16 Apárokamp arop ponankor sámpá paokop i konap ninik te, námokuráp ninik mek poup kikiank i konap ninik, tá yi fek nkea kikianknep ninik, tá, námo nkwakwe make kokop namprianámp ninik, má ankank máte Naropwar Kwaronámpoknámp korop mono, apárokamp ninikono. 17 Mámá apár ntia am mek yaknámp kikiank ninik méntér pwar naenámp. Aeno arop Kwaromp kar wawia mántwaok yárák námp te fwap yaká yak naenámp.^r

Kraisomp kar kwe-pwar naenámp arop korop naenámp kar

18 Tárápu, oukoumwan te apár pwar naenámp yae wae wonae fikono. Yumo wokwaek te, 'Krais namponoria poupwekápnámp arop korop naean'rá sénap kar wae wawiapon. Táte wae oukoumwan kápae kare, Kraiso namponoria poupwekápnámp mwanap arop wae korop napon. Aenapara, nomo wae mér: Am te wae yae fae nánko napon.^s 19 Manénkir te am fárákap nomont yakápi napao maok, nomwan pwarará tukup tenapon. Am fárákap te kare kar nomp kare mono. Táte am fárákap nomp kareraoia te fwap nomont yakápnámp mwanapan maok, mao nomwan pwar napon, nomo wae mér: Am fárákap te nomp kare mono.^t

20 Aeno yumwan Kwaro waeman yiráp pourou mek Yiki Kor Spirit kwarákari námpara, yumo ponankor waeman mér kwapwe sámpá yakápnámp napon. 21 Aenapara, ono te yumwan, kare kar kar mér mo napon ninikria yiráp por má kar kumwi mono. Yumo waeman kare kar kar méria, am kare kar karao kwekár kar sámp-pap mo i konámp te, yumo wae mér napantá, ono yiráp por mámpá kar kumwi nampon.

22 Kwekár i konámp arop te wanono? Am arop 'Jisas te Krais mono'rá sénámp arop te támaono. Am arop te Naropwar Kwar ntia maomp Táráp younkwe sánk konámpara, Kraisen yopornámp aropono.^u 23 Aropao Tárápan younkwe sánk námp te, Naropwarén kor younkwe sánk námp. Aropao Tárápan méria ninik mek sámp námp te, Naropwarén kor méria ninik mek sámp námp.^v

Yiki Kor Spiritao nomwan kare kar karan yéknámp kar

24 Yumo wokwaek wawiap kar ankár kárakáre fek níki-samp kip. Yumo am wokwaek wawiap kar am níki-samp napo te, Táráp ntiaka Naropwar yumont yaká yak nerepon. 25 Kraiso nomwan sérinámp kar te 'Yae-párak kare yiki yaká yakápnámp mwanaponora séri námp támaono.^w

26 Ono yiráp por kumwinamp kar máte yumwan poupwekápnámp aropamp ninikan érik farákarrá kumwi nampon. 27 Aeno Kraiso náráp

^q 2:15 Ro 8:7; Je 4:4 ^r 2:17 Mt 7:21 ^s 2:18 Mt 24:5,24; 2 Jo 7 ^t 2:19 Ap 20:30

^u 2:22 Mt 10:32-33; 1 Jo 4:3; 2 Jo 7 ^v 2:23 Mt 10:32-33; Jo 5:23; 2 Jo 9 ^w 2:25 Jo 3:15; 6:40

Yiki Kor Spirit yumwan kwarákarea pwar nánko, am yumont yak námpara, arop ankwapao yumwan Kwaromp ninikan yéncép naenámp tére yak mono. Am te apaerianápe, Yiki Kor Spiritao yumwan waeman kápae kare ankank farákáp námpara, yumo te ninik fae tákáre mono. Am Yiki Kor Spiritamp kar te kwekár mono, kare sénámpon. Aenámpara, Spiritao yumwan yéncép námpnám taknám, yumo ankár Kraiséen ninik mek fákapea sámpá paokop kipo.^x

²⁸ Onomp tárápu, yumo te ankár Kraiséen koumpá yakáp kipo. Tak napo maok, nánkár wakmwaek mao érik korop nánko, nomo man nkea pwarápe mo, yae-párák kare kárákáre fek warákárrá yakáp mwanámpon.^y ²⁹ Táte yumo Kraiséen, mao te yae-párák kare aroponoria mér nap kwamp te, yumo nke napo, arop ponankor yae-párák kare ninik fek paokop nap te, mao kor Kwaromp tárápunorá mér mwanapon.^z

Nomo oukoumwan Kwaromp tárápu yakápnám kar

3 ¹ Wakwe! Naropwaro námokuráp ninik fek yonkwae touwe kareria maok, nomwan ‘Onomp tárápu’rá sénámpara, nomo te waeman kare kar Kwaromp tárápunon. Apárok mapekamp arop te Kwarén mér mo napara, taknám nomwan kor mér mo napon.^a ² Ononamp fárákap, nomo oukoumwan te Kwaromp tárápu yakáp námpon. Aeno nánkár wakmwaek te mokoprá yakáp mwanámpaoean, am te nomo fwapia mér mo námpon. Aeno nomo wae mér námpon: Nánkár wakmwaek te Kraiséen érik ék nánko, nomo wae mao karean nkea maok, nomo kor Kraiséen námoku yak nám niamp taknámpi yakáp mwanámpon.^b ³ Arop ponankor Kraiséen yépekrá yakáp i konap te, Kraiséen yiki kare yak námpnám taknám am fárákapao kor námokuráp ninik fwapokwaprá yiki kare yakáp i konapon.

⁴ Kwatae ninik te ankár lo kar kwe-sinámpara, arop kwatae ninik fek yáarak i konám te, Kwaromp lo kar ták-sinámp. ⁵ Yumo te waeman mér napon: Kraiséen te nomp kwatae ninik ti-akwap naeria, korop námpao maok, mao námoku kare te kwatae ninik yak mono.^c ⁶ Arop Kraiséen koumpá yak nám te, mao te kwatae ninik fekamp ninikaok yáarak mo i konámpon. Aeno arop ankwap námokuráp kwatae ninikaok yáarak nánko te, nomo waeman wuri nkea mér námpon: Am arop te Kraiséen nke mo, tá Kraiséen mér mo námpon.^d

⁷ Onomp tárápu o! Yumo fwapia mér kip: Arop ankwapao yumwan kwekárrá sér mwanape. Arop yae-párák kare ninik fek tére nám te, am arop te yae-párák kare arop Kraiséen niampono.^e ⁸ Wokwaek kar Satano kwatae ninik sámpámpara, arop kwatae ninik fek yak nám te, mao te Satanomp aropono. Kwaromp Táráp te Satanomp téreran kwatae papea

^x 2:27 Jo 14:26 ^y 2:28 1 Jo 4:17 ^z 2:29 1 Jo 3:10 ^a 3:1 Jo 1:12-13; 16:3

^b 3:2 2 Ko 3:18; Fl 3:21 ^c 3:5 2 Ko 5:21; 1 Pi 2:22-24 ^d 3:6 Ro 6:1-2,14 ^e 3:7 1 Jo 2:29

kwe-pwar naeria érik ék námpon.^f ⁹Arop ankwap Kwaromp táráp yoro nám p te, kwatae ninikaok akwap mo i konámpon. Waeman Kwaromp ninikaok am aropamp ninik mek yak nánko, Kwaro maomp Naropwar yak námpara, mao te warko kwatae ninikaok yarak mo i konámpon.^g ¹⁰Aeno nomo wa mokop Kwaromp tárápaoean, tá wa Satanomp tárápaoean mér mwaria te, arop kwapwe kare ninik fek yarak nánko nkeaka, ‘Mao te Kwaromp tárápono’rá sér mwanámpon. Aeno arop kwatae ninik fek yarákria, maomp Kristen ankwapyaeenápén warákár mo nánko te, mao te Kwaromp monorá mér mwanámpon.

Kristen ankwapyaeenápén warákár konap ninik

¹¹Yumo wokwaek te kar arakrá wawiapon: Nomo ankár nomp ankwapyaeenápént nonopok nounouroup mwanámpon.^h ¹²Nomo te Kenoimp niamp ninik fek yakáp mwareano. Ken te Satanomp arop yakámpara maok, náráp nánaeran námoku sámp-wouroumpámpon. Am te apaeritea nánaeran sámp-wouroumpámpon? Nánaeramp ninik te yae-párák karenko, námokuráp ninik te kwatae nám p kwamp yopor yonkwae pwarámpria sámp-wouroumpámpon.ⁱ

¹³Ankwapyae fákáre, apárokamp arop yumwan, nke te mo karonoria yopora wae napo te, yumo am táman kokorokori kwapono.^j ¹⁴Nomo ankwapyaeenápén warákár nám p kwamp te, am ninik táman mér mwanámpon, nomo waeman sumpwi mwanám p ninik te pwatea yiki yakáp mwanám p ninikaok yakáp námpon. Aeno arop Kristen ankwapyaeenápén warákár mo nám p te, am arop te sumpwi konap ninik fek yak námpon.^k ¹⁵Arop ankwapnápén, námo nke namp fek yak te monoria youpoukwap nám p te, waeman arop sámp-wouroump nap niamp námpon. Yumo te waeman mér napon: Arop ankwapan sámp-wouroumpnám p arop te, mao te yiki yaká yak naenámp kwapwe te sámp mono.^l ¹⁶Jisas te nomwan yaewourria náráp pourouk touwe sámpámpon. Takimp ninik te nomwan arop yonkwae touwe konap ninikan yénkép námpon. Ae nám p te, nomo Kristenara, nomo kor nomp Kristen ankwapyaeenápén yaewourrá nomp pourouk touwe sámp mwanámpon.^m ¹⁷Aeno arop ankwap apárokamp ankankrápao Kristen ankwapyaeenápén nke nánko, ankank mo nánko, man yonkwae touwe moria ankank sánk mo nám p te, mao te ‘Ono te Kwarompono’rá sénaeane. ¹⁸Onomp tárápu o! Nomo nomp ankwapyaeenápén párák kar fek saráp yonkwae touwe mwareano. Ankár am fárákapan yonkwae touwe kateria ankár kwapwe kare ninik fek yaewour mwanámpon.ⁿ

^f 3:8 Jo 8:44 ^g 3:9 1 Jo 5:18 ^h 3:11 Jo 13:34-35 ⁱ 3:12 Stt 4:8 ^j 3:13 Mt 5:11-12;

Jo 15:18-19 ^k 3:14 1 Jo 2:11 ^l 3:15 Mt 5:21-22 ^m 3:16 Jo 13:1; 1 Te 2:8

ⁿ 3:18 Lo 15:7; Je 2:15-16

‘Kwarén mérnáp arop te Kwaro nke nám̄p fek apáp mono’rá sénám̄p kar

¹⁹⁻²⁰Nomo am arop yonkwae touwe mwanám̄p ninikaok paokop nám̄p kwamp te, nomo wae mér nám̄pon: Nomo te waeman am kare kar karwaok paokop nám̄pon. Kwar nám̄oku maok tokwae karara, kápae kare ankank wae nám̄oku méri yak nám̄para, nomo te, wae yae-párák kare ninikaok namp nierá ninik tokwae kwapono. Kwaro waeman nke nám̄para, sánánkar yonkwae porokwe fek yakáp mwanám̄pon. ²¹Ononamp fárákap, nomp ninik mek kwatae ninik yak nám̄prá mo nám̄p kwamp te, nomo Kwaro nke nám̄p fek apáp moria, yae-párák kárákáre fek yakáp konám̄pono. ²²Nomo Kwaromp loak tukupria, Kwaro warákár konám̄p ninikaok paokop nám̄para, nomo Kwarén apae ankank ‘Sápae’rá sénánko te, fwap sáp naerám̄pon.^o ²³Kwaromp lo te ará: Nomo maomp Táráp Jisas Kraisé́n méria maok, mao nomwan séri nám̄pnám̄p taknám̄p nomo ankár nomp ankwapyaenápén nonopok nounouroup mwanám̄pon.^p ²⁴Aeno táte arop ankwapao Kwaromp loak saráp yárák nám̄p te, mao te Kwarén koumpá yak nánko maok, Kwaro kor mént koumpá yak nám̄pon. Kwaro nomwan Yiki Kor Spirit sáp tari nám̄para, am Spiritao Kwaro nomont yak nám̄p yé́nkép nám̄pon.^q

Spirit fákáreran yurukup mwanám̄p kar

4 ¹Ononamp fákáre, kápae kare kwekár profet apárok má paokop napon. Aenapara, arop ponankor ‘Námo wae Kwaromp Spiritráp’rá sénánko te, tamak kare karonorá niniki kwapono. Yumo ankár, máte Kwaromp Spiritaoeane, tá ankwap spirit kwataeraoi kanrá fwapia yurukup kipo.^r ²Yumo Kwaromp Yiki Kor Spirit yakápnap arop te, arakrá sénap aran wawia mér mwanapon: Arop ponankor ‘Jisas Kraisé́n te apárokamp arop kare arákari nám̄pon’rá sénap te, am arop fárákap te Kwaromp Yiki Kor Spirit yakápnap arop támaonono.^s ³Arop ankwap fárákapao ‘Jisas arop kare arákár moi nám̄p’rá sénap te, am arop fárákap te ankwap spiritrápono. Am te Kwaromp Spiritráp mono. Am spirit te yumo wokwaek wawapo, Kraisé́n yopornám̄p arop korop naenámonoriap te, oukoumwan wae apárok koroepa yak nám̄pon.^t

⁴Onomp tárápu o! Yumo te Kwarompara, kwekár i konap profet fákáreramp kar te waeman kwe-pwarari napon. Yiráp pourouk woukoupá yaknám̄p Yiki Kor Spirit te apárokamp aropamp pourouk woukoupá yaknám̄p spiritan kwe-pwar nám̄pon. ⁵Am arop fárákap te apárokamp aropara, am fárákapamp karao kuri apárokampono. Aenánko, apárokamp arop ankwap fárákap am fárákapamp kar táman wawi konapon.^u ⁶Nomo

^o 3:22 Mt 21:22 ^p 3:23 Jo 6:29; 13:34 ^q 3:24 Ro 8:9 ^r 4:1 Mt 24:11 ^s 4:2 1 Ko 12:3

^t 4:3 1 Jo 2:18,22; 2 Jo 7 ^u 4:5 Jo 15:19

te Kwarompara, arop Kwarén mér námp te, am arop te nomp kar wawi konámpon. Aeno arop Kwaromp firáp mo námp te, mao te nomp kar wa mo i konámpon. Aenapara, am taknap ninik táman maok, nomo nkea méria Yiki Kor Spiritao kar kare sér i konámp mér, tá kwekár i konámp spiritamp kar wawia mér mwanámpon.^v

Kwaro nomwan nouroupnám kar

⁷Onomp nouroup fákáre, nomo te ankár nonopok nounouroup saráp yakáp mwaro. Am te apae riteanápe, nounouroup i konap ninik te Kwaromp ninik támaono. Arop ankár ankwapan nouroup i konap ninikaok yarak námp te, Kwaromp aropara, mao te Kwaromp táráp támaono. ⁸Kwar te am arop nouroup i konap ninik fi korara, aropao kor ankwapan nouroup mo námp te, Kwarén mér monámp aropao námpon. ⁹Kwar te Táráp ankárankamp karean maok, am Táráp apárok mapek sámp-kérépámp te, nomwan Kraiso yiki yak ti-sáp nánko, am yiki yak sámpenkria sámp-kérépámpon. Am takimp te, Kwaro nomwan aropomp kare námpan yéncép námpon. ¹⁰Aropomp i konap ninik te apae nomomékir Kwarén aropompi námpanápe. Aropomp i konap ninik te Kwaromékir nomwantá aropompiaka náráp Táráp Kraisen sámp-kérép nánko, mao ékia, nomp kwatae ninik fek sumpwianánko, Kwaro am kwatae ninik warko nik mo, pwarará, érékép námpon.

¹¹Ononamp fákáre, má ninik máte Kwaro nomwan nouroup námpan yéncép námpara, nomo kor taknám ankár nonopok nounouroupa wae mwanámpon. ¹²Arop ankwap ankárankao Kwarén te nke mo kare námpao maok, nomo nomp Kristen ankwapyaenápén nouroup kare námp te, Kwaro nomont yak nánko, maomp nouroup i konámp ninik nomp ninik mek tokwae kari akwap námpan nkea mér mwanámpon.

¹³Ae te mokopono? Nomo Kwarént koumpá yakáp nánko, tá nopok Kwaro kor nomont koumpá yak námp fwap mér mwanám nie? Nomwan waeman námokuráp Yiki Kor Spirit sáp tari námpara, wae mér námpon.^w ¹⁴Naropwar Kwaro, apárokamp aropan warko ponankor éréképaeriaka, náráp Táráp sámp-kérép námp, yino wae nke námpan, yino am kar farákáp konámpon.^x ¹⁵Tá arop ankwapao 'Jisas te Kwaromp Tarápono'rá sénánko te, Kwaro am aropént koumpá yak nánko, tá am aropao kor Kwarént koumpá yak námpon. ¹⁶Aenámpara, Kwaro nomwan aropompi námpan, nomo am táman mér námpon.

Kwar námoku te ankár aropan aropomp i konámp fi korara, aropao kor ankwapan aropompnám arop te, Kwarént koumpá yak nánko, te nopok Kwaro kor am aropént yak námpon.^y ¹⁷Kristen ankwapyaenápén nouroup i konap ninik nomp ninik mek tokwae kari yak námp te ará:

^v 4:6 Jo 8:47 ^w 4:13 2 Ko 1:21-22 ^x 4:14 Jo 3:17 ^y 4:16 Jo 6:69

Nomo oukoumwan apárok mapek yakáp nám̄p fek waeman Krai niamp pourouráp yakápi nám̄para, nánkár wakmwæk kot mwanap yae tokwæ fek te, nomo apáp mo, fwapono. ¹⁸ Kwaro nomwan nouroup kwapwe nám̄para, nomo apáp mono. Am te apaerianápe, am nouroup kwapwe te apáp ninik yéréperá kérép konám̄pon. Aeno apápnám̄p fi kor te ará: Arop námokuráp kwatae ninik fek touwe sámp naenám̄pan ninikrianám̄pon. Táte arop apáp nám̄p te, maomp arop nouroup i konám̄p ninik te maomp ninik mek tokwæ kari yak mo nám̄pan mér mwanám̄pon.

¹⁹ Am te Kwaromékir nomwan nouroup kare nám̄para, am fek táman nomp Kristen ankwapyaenápén nouroup nám̄pon.^z ²⁰ Tá arop ankwapao ‘Ono Kwarén nouroup kare nampono’rá sénámpao maok, tá warko ankwapnápén kokwarok nám̄p te, maomp kar te kwekár nám̄pon. Arop énéni tapokwapá yakáprá wae yi fek nke nám̄pan man kokwarok nám̄p te, mao yi fek nke monám̄p Kwarén te mokopia nouroup naenám̄pon? ²¹ Nomo Kraiomp lo sámp nám̄p te aráno: Arop Kwarén nouroup nám̄p te ankár taknám̄p náráp ankwapyaenápén kor nouroup kuno.^a

Kwarén mérnap arop apárokamp kwatae ninikan kwe-pwar konap kar

5 ¹ Arop ponankor Jisas te Kraisonorá mér nap te, am fárákap te Kwaromp tárápu yakáp napon. Arop ponankor naropwar ankárankan nouroup nap te, ankár maomp tárápuan kor nouroup i konapon. ² Nomo Kwarén nouroup kareria, nomo maomp loaok tukup nám̄p te, nomo wae mér nám̄pon: Am ninik fek táman maok, nomo Kwaromp tárápuran kor nouroup kare nám̄pon. ³ Nomo Kwaromp lo karaok saráp paokop nám̄p te, am támao yénképrá: Nomo waeman Kwarén nouroup kare nám̄pon. Aenám̄para, am lo te nomwan kour-sir naenám̄p pourou mono, fwap ampaok paokop mwanám̄pon.^b ⁴ Arop ponankor Kwaromp tárápu yakáp nap te apárokamp kwatae ninik te kwe-sir konapon. Nomo waeman Kwarén mér nám̄para, am fek táman apárokamp kwatae ninik te yorowaria kwe-pwarará apárok sámp-anám̄p konám̄pon.^c ⁵ Wa apárokamp ninikan kwe-pwar konám̄pon? Arop Jisasén Kwaromp Táráponoria mérnám̄p arop támao kwe-pwar konám̄pon.^d

Kwaro Jisasoinám̄p ninikan érik sénám̄p kar

⁶ Jisas Krai ékám̄p te, ént mek anámpeaka maok, tá yaopwæ porokopramp fek námokuráp yirirao oupouroup naenám̄pria ékám̄pon. Mao te ént mek anám̄p konap ninik fek saráp ék mono. Ént ntia yiriramp ninik fek ékám̄pon. Yiki Kor Spirit mao te kare kar sér i konám̄p fi korara, mao kuri am Jisas Kraiso i nám̄p táman farákáp nám̄pon.^e

^z 4:19 1 Jo 4:10 ^a 4:21 Mt 5:44-45; Mk 12:29-31 ^b 5:3 Mt 11:30; Jo 14:15,23-24
^c 5:4 Jo 16:33 ^d 5:5 Ro 8:37 ^e 5:6 Jo 1:29-34

7 Waeman yininkaopwerao maoui námp farákáprá sénapono.^f 8 Yiki Kor Spiritao sénámp kar, éntao sénámp kar, yirirao sénámp kar, am yininkaopweramp kar máte ankáránkamp pourouráp kar sénapono. 9 Arop kotriaka am kar fi sénapo, wawia kareno ri konámpan maok, Kwaro sénámp kar te aropamp karan kámákár akwap námpon. Am kar Kwaro farákáprá sénámp te mao náráp Tárápao tére námpan nomwan sénámpon.^g 10 Arop Kwaromp Tárápan mér námp te, waeman am Kwaro farákápnámp kar sámpeanánko, maomp ninik mek yak konámpono. Aeno arop Kwarén mér mo námp te, Kwar námokuráp Tárápao térenámp kar kare farákápnámpan kor mér mo námpon. Am tak námp támao mér naenámp kwe-sinámpara, am arop te ‘Kwar te kwekár sér i konámp arop’rá sénámp niampon.^h 11 Mámá kare kar kar Kwaro farákápnámp te ará: Kwaro nomwan yiki yakápnámpan sápnámpon. Am yiki yak fi te Kwaromp Tárápamp pourouk yak námpon. 12 Arop Kwaromp Tárápént saráp koumpá yakápnámpan te, waeman am yiki yak sápnámpono. Aeno arop Kwaromp Tárápént koumpá yakápnámpan mo nap te, am yiki yak te mono.ⁱ

Nomo te wae yiki yak sápnámpan mér mwanámp kar

13 Yumo Kwaromp Táráp Jisasén mérap te, yumo wae yiki yak kwapwe sápnámpan, am fwapia mér mwanapria, yumwan má kar kumwia kérépnámpono.^j 14 Kwaro nomwan yaewour naeria warákár námpana, nomo apáp mono, maomp wonae fik tukupria, mao waeman námoku sánk naeria nánápnámpan ninik mek sénánko te, tá fwap nomp kar wa naerámpon.^k 15 Nomo wae mér námpan: Nomo man kar toropwap námp te, mao wae wawi konámpan. Ae konámpana, nomo am táman wae méria, nomo man ‘Ankwap ankank sápnámpan’ ria sénámp te, nomo am ankank te wae sápnámpan mér námpan.

16 Aropao náráp ankwapyaenápnámpan nke nánko, maomp waemp fwap warko Kwaromp wonae fik korop naenámpao, kwatae ninik fek akwap nánko te, Kwarén sénánko, Kwaro am aropan yiki yak naenámp sánk naenámp. Ono te am sumpwi pap mo i konámp pourouráp kwatae ninikan sénámpono. Arop ankwap maomp waemp warko Kwaromp wonae fik akwap naenámp pourou monámp kwatae ninik nánko te, ono yumwan ‘Kwarén “Maomp kwatae ninik sápnámpan-sirae”rá sér kip’rá sér mono.’^l 17 Ponankor ninik yae-párák mo námp te, am te kwatae ninikono. Aenámpan maok, ankwap pourouráp kwatae niniki tenánko, fwap Kwaro sápnámpan konámpani námp te, maomp waemp fwap Kwaromp wonae fik yak naenámp.

18 Nomo wae mér námpan: Arop ponankor Kwaromp tárápu yakápnámpan nap te, warko kwatae ninik i konap ninikaok saráp yakápnámpan mo i konap.

^f 5:7 Jo 15:26 ^g 5:9 Jo 5:32-37; 8:18 ^h 5:10 Ga 4:6 ⁱ 5:12 Jo 3:36 ^j 5:13 Jo 20:31
^k 5:14 Jo 14:13 ^l 5:16 Mt 12:31

Waeman Kwaromp tárápao man taokeyak námpara, Satan te am aropamp pourouk yae pap mono.^m

¹⁹Satan te mámá apár poukeyak nánko, ponankor maomp yae ankore mek yakáp napo, nomo te mwar Kwaromp tárápu yakáp námp te, nomo wae mér námpon.

²⁰Nomo wae mérámpon: Kwaromp Táráp waeman ék námpara, mao nomwan ninik sáp nánko, nomo fwap Kwar kare mérria waeman Kwar kare ntia maomp Táráp Jisas Kraisént yakáp námpon. Am Kwar te karenono. Tá mao te yiki yaká yak fi kor támaono.ⁿ

²¹Onomp tárápu, ankwap ankankao yiráp kwar niamp yak naeane. Ankár younkwe sánk kipo.^o

^m 5:18 Jo 17:15 ⁿ 5:20 Jo 17:3 ^o 5:21 1 Ko 10:14